

Երեխաները. թող որ քո՛ւ ծոցիդ մեջ  
 Մըկըրտըւին, եւ ծըծեն կուռ ծիծերեդ  
 Կաթը վաղուան վըրեժին:  
 Օ՛ն, Նեմեսիս, իջիր մե՛ր մեջ. մեզ ըրե  
 Վահան լանջքիդ մարմարե,  
 Սո՛ւրը թելիդ անխընայ:  
 Չի մենք ծարաւ ենք արեա՛ն,  
 Արեա՛ն, արեա՛ն Նեմեսիս”:  
 Կ’ըսեն: Իրենց գոռուգոչումն ահաւոր  
 Կը սասանե գահերուն վրայ կայսրըներ,  
 Եւ կ’օրօրե պատուանդանին վրայ նընջող  
 Քերթողին քունն հանդարտիկ:  
 Կ’ըսեն: Եւ նուէ՛ր Աստուածուհւոյն կ’ընծայեն.  
 Անոր առջեւ արիւնլըւայ ձեռքերով  
 Կը սըփռեն վարդ ու յասմիկ:  
 Կոյս աղջիկներ դալկադէմ  
 Ասեղներե ծակծակուած գիրգ մատերով  
 Կ’հիւսեն անոր գըլխուն համար պըսակներ:  
 Գիւղացիներ կ’ողջակիզուն վերջին ուլն  
 Իրենց թափուր եւ ցըրտացած փարախին:  
 Տըղաք կընդրուկ կը ծըխեն.  
 Իսկ բանուորներն ու ռազմիկները պարման  
 Թուրերն իրենց, մուրճերն իրենց նուիրական  
 Կու գան անոր կըռուանին վրայ հեսանել:  
 Եւ ժողովուրդը բովանդակ յանկարծ լուռ  
 Լուսընկային տակ հանդարտող ծովու պէս  
 Կը խոնարհի աղօթքի...  
 (Օրհնեա՛լ ըլլաք, հառաչանքի մեջ խեղդուած  
 Ո՛վ արցունքներ, մազերե վար կայլակուող  
 Ո՛վ արիւնի կաթիլներ.  
 Ո՛վ աղօթքներ նախատօնին կռիւներու